

## „Ленинск“ совхоз хө киргългъиг болзгтнь бүрдәмджтагъяр кехдән белн

Майин хөрнәс авн хөд киргългънә кәдлмш эклджәнә.

Целинн района „Ленинск“ совхозд хө киргългънә кәдлмшт сәән әр белдцхәдж.

Цуг хөд киргъх 4 агрегат, 48 машинкс, ноос шахк хойр машинкс болн нань чигн кергтә хамгинь бас белн кечксн бәәнә.

Хө киргъх 18 чадмг-чидмг әмтн бәәнә. Киргългънә пунктн гардач Кочетов, киргългънә агрегатн гардач Бугаев хойр, майин арвн гурвнас авн, хөд киргъх арвн кӯ бас сургъдж белдджәцхәнә.

Энджл хө киргългънә кәдлмшиг 18—20 өдрин туршарт кедж дуусхнь лавта. Ахр цагин эргцд хөд киргългънә кәдлмшиг төгсәхләг кесг центнер невр ноос киргъдж авхмн гидж тоолджанавдн. Юньгад гихлә, хө киргългънә цагинь өнъгрүлчкхлә, хөд ноосан геегъад йовх зөвтә, тер

учр деерәс, цаглань хөбдән киргъдж төгсәх кергтә.

Энджл „Ленинск“ — совхоз кесг агрегатсиг хамцулдж бүрдәджәнә. Тиигәд бүрдәхләг, өдртән 1200—1300 хө электроагрегатар киргъдж болхмн.

Киргъсн ноосиг чикәр тоолдж дигллгън—йир чинртә кәдлмш. Киргъсн ноосиг отар болгънар онц сән муугъинь йилгъдж авхла бас йир сән керг гидж тоолхмн. Эн кәдлмшиг сән диг-дарагъинь олдж кехин кергт, киргъсн ноосиг сән-муугъинь йилгъдж хәдәлгънә лаборатор бүрдәджә.

Мана совхозд хө киргългънә кәдлмшт сән дамшлтта кәдләчир олн. Ёлгүрлхд, үр Стакозова Галина, Ишанова Евдокия болн нань чигн мастермүд бәәнә.

**Э. ЦЕБЕКОВ,**  
совхозин зоотехник.